

111 年全國語文競賽客家語讀者劇場文本高中組（詔安腔）

編號 2 號

【人公】徐月里原作

記得係讀國民學校一年個時，真驚生份。等係讀到三年遐時，膽即越來越大，有時務會在街路行上行落見世面。有一日，係著遐雙大概著有兩年、無幾合腳又擱好好個鞋屐，在市場脣個街路萬位趨。

哦！遐舊街路有一間洋品店，聽講店內底賣真多洋貨。有賣遐紅色布面、白色鞋帶、妹子人著個關公鞋。過年個時，係依識拗係買一雙，講係讀書個時務即好著。店面頭前排一擔會用徙停動個細糖攤，有賣抽糖個物件，嘛有賣一兜仔假銃啦、紙牌啦、人公啦這兜細子人賞奈個物件。一半下係討著五角銀，即會去抽糖來食。遐日真錫係個物件，係用枋釘起來個，吊在架竦個遐身——用光面塑膠紙包起來個塑膠人公。

遐身塑膠人公真特別，佢個頭那毛虬虬鬚鬚，目珠圓圓金金，會停動，目珠毛翹翹，鼻尖尖，鼻空細細，手腳幼幼長長，會用變換手勢。遐兩支手骨略略彎彎，會用攞物件，手指頭尖尖翹翹，兩支腳長長跟腳尾，有一雙細細雙個高睜鞋會用替換，高

睜鞋呢<sup>1</sup>！會企又會坐。著一領到位膝頭個洋服，上身胸大大，腰細細，下身係百欄個膨裙，滿足靚個人公哦！係實在真想討買。

頭家睜著係企在擔頭前睜恁久，行俾來問講：「細漢妹子，有想討買無？轉去拗屋下人討錢來買！」遐正經係驚死人個價數，你知無？係愛幾下禮拜正討會著五角銀好買食，遐睜子五角銀會用買著甜甜擱透心涼個清冰一支呢！頭家講遐身人公愛「十七籬」！

係拚緊緊轉去拗係依講。大氣接小氣講嘛講毋會清，猶直直揪係依個手去現場睜。唸嘛唸啊，亂嘛亂過啊，係舞到自家歸面個目汁和鼻水。係依講：「這滿屋下哪有恁多個閒錢好買？毋好擱唸啊！阿依做一個得人惜個布人公得你賞。毋好唸到像抽雞腸，好恬啊！這五角銀收好勢！」係毋甘願歸毋甘願，一時嘛無麼個步數。自家嘛知實在係罔亂罔亂，鼻摸摸個、目汁猝猝燥，即恬恬無擱吵阿依啊。

<sup>1</sup> 呢：音 ne<sup>6</sup>；表示加強、確定的語氣。

111 年全國語文競賽客家語讀者劇場文本高中組（詔安腔）

編號 3 號

【栗子籽】江昀原作

佢哥係大漢个細子人，自細蹣在山內，滿山趟滿山走，山內个樹種、野花、山草，真少係佢毋識个，毋使講香絲、油桐樹和高天天个黃牛檀、栗子樹，佢攞真熟。過兩日即係聖誕節啊，佢哥用掛號寄來成十粒个栗子籽。咖啡色个栗子籽，像手指尾恁細粒，長長圓圓，差不多像蓮子个形。毋過栗子籽有確確，做細子个時務，專門檢來做摔賞，在蒂平平个所在擲一節香腳落去，利用尖尖个尾做支點，尋一粒平平个石頭抑係桌嶼，用手指公和第二指拗香腳捏个，輪一下，栗子籽即會玲琅玦，脛麼儕玦較久，來比輸贏。

賞栗子籽个記憶，得佢想著屋角頭遐頭牛眼樹，牛眼樹真大頭，歸年透天青拚拚，大人細子即真愛在樹下歇涼。樹下有一粒全然大粒个石頭，長長又平平，真堵好坐。輪栗子籽比賽大約即會在這進行，輸个人愛得贏个人一粒栗子籽，栗子籽越多个人即越好額。成過个細子無麼个錢通開，正係藏一兜玻璃珠、紙牌抑係栗子籽，一半下蹣在街路个細子無位好檢，即會來拗佢買，恁即會用趁兩點錢買糖食。所以講這兜物件即係山嶼細子个財產。

佢哥自細即真精，講著賞即直頭去。佢用鉛線拗个輪又圓又靚，真好勢，得人賞到毋會懶；佢削个樹乳擗金金又勇，緝一條樹乳落去，脛係討打鳥抑係打果子攞會用，和學校个同學攞會拗佢注文。

有一擺，城市來个先生講想討食水蕨，佢哥七早八早即跋起來，飯嘛無食，書包背蹣去圳溝脣拗水蕨，拗到一大拿，儘採擷一支草網網个，即討隨去學校得先生。頭前腳正蹬出水面，即脛著一尾水蛇趟過來，佢哥著驚一下走到無脛人，一路走到學校，腳嘛無貼地。對遐擺起，先生出較高个價數，佢嘛毋肯拗先生拗水蕨啊。

佢哥正經係大漢个細子頭王，若係脛著細子人在鬥「無敵鐵金剛」抑係弄布袋戲，佢攞會去共下賞、鬥鬧熱；一半下猶會教細子人用讞鏡引日頭做科學研究，所以細子嘛真愛尋佢。三輪車壞去啦、「芭比娃娃」手斷去啦，拼圖鬥毋會起來啦……，麼个奇奇怪怪个齣頭攞會來尋佢。佢正經真熱心，大人細子即足愛和佢作埕，自細到大佢个人緣真好，相識滿天下。佢出去旅行个時務，正隨兩領衫褲即會用，行到哪位食到哪位，毋管山嶼海脣，哪位即有朋友，大家攞真歡迎佢，佢總係會隨得大家歡喜。

111 年全國語文競賽客家語讀者劇場文本高中組（詔安腔）

編號 4 號

### 【 佢个休閒生活 】古美珠原作

「有閒時務唱山歌，人生毋使過頭勞，貧窮富貴命注定，身體康健快樂多啊快樂多。」現時个人因為頭路真無閒，生活壓力真大，大家透日即無閒挾掣，做到烏頭暗面。大人為著愛照顧家庭，生活做事以外猶係做事；讀書人為著討考一間較好个學校，逐日認真讀書，不時讀到無日無夜。佢正無恁惹，功課雖然要緊，毋過生活內底，嘛係愛有適當个休閒活動，來得個人較輕鬆正著。

現時个休閒活動有麼个咧？像旅行、睇電視、睇電影、睇書、運動、跋山，猶有今頭時行个騎鐵馬等等。佢个休閒生活真精彩哦！像佢真愛唱歌，無論係國語歌、學老歌、英文歌抑係客歌，佢攞會唱。唱歌毋使幾好个所在，隨時即會用唱，得你唱到雞毛沉落水，抑係石頭浮起來，嘛無人會管你，佢不時唱啊唱，心情即快活啊！

禮拜日，佢會尋阿弟共下去學校打籃球抑係羽毛球。打籃球毋若好賞，聽講嘛會得佢生到攔較高哦！羽毛球个速度真緊，佢即會像孫猴共款，飛上飛落，即驚接毋會著球。見擺攞賞到流汗

落滴，歸身濕濕，實在真快活哦！打球得佢添放讀書个辛苦，歡喜到佇毋會核咧。

人講：「花開滿園自然香，八月秋風漸漸涼。」秋天八月半遐站頭適合出去行行个，滿哪位奈。歇睏个時務，佢怙捷捷渡佢人出去行行奈奈。佢頭愛去溪底，捉魚捉蝦，溪水又清又涼，魚在遐洄來洄去，佢拗鞋脫起來，攔緊跳落溪底，遐種感覺正經係透心涼，害佢見擺攞奈到毋知好轉，這兜即係佢个休閒生活！

雖然逐儕个休閒生活無一定共款，有人愛打球，有人愛睇電影，嘛有人愛睇書；愛做麼个攞無要緊，頭要緊即係愛尋一件適合你个休閒活動，來得你輕鬆一下。大家在今恁誠無閒个社會，毋好拗頭路抑係課業當做你歸下个生活哦！等到老啊，正來苦感即毋會赴啊！愛記得，歇睏係為著行攔較遠个路，所以，無論大人抑係細子，大家攞愛來安排個人个休閒生活，得自家逐日攞會用輕鬆又快活。

111 年全國語文競賽客家語讀者劇場文本高中組（詔安腔）

編號 6 號

### 【學勤三年，學懶三日】徐子涵原作

自係猶真細漢個時，係依即捷捷拗係講：「泥愛日日掃，田愛日日到，書愛時時讀。」又講：「一日學習一日功，一日無學十日空。」所以，無論學校係上課抑係歇暈，係依規定係兩姊妹，逐日攞愛讀書、愛運動、愛拚掃！因為越奈越懶尸，越睡越慳侗。慳人人啊，學勤，愛三年，學懶，毋使三日哦！

無毋著，慳人愛過真久個時間，正會改去懶尸个性情，定著無法度在兩、三日內即養成勤个好習慣。若講毋肯做事、毋肯停動，兩下半即會懶尸去！懶尸人做麼个嘛難，和食飯嘛懶尸煮、懶尸食。

猶記得有一年歇熱，堵堵好係依做頭路真無閒，係想討懶尸一下，一站無讀書、無運動，應當無麼个要緊，即偷偷去睺電視、打電腦，毋係食即係賞，逐日攞歡喜得天，生活真享受！無想著，正幾下日定，即擱起懶尸骨，逐日睡到日頭灸尿肫！歸日溜溜漂漂<sup>1</sup>，若像閒身人共款，一日過一日，時間即恁得係白白打爽去啊！

到討開學個時務，正知屎掣愛開屎缸！歸大墩个事旨做好，無頭無尾，得係毋知愛仰子正好！攞緊讀書寫字，毋過，睺無兩下書，寫無兩行字，即無精神到頭暈暈愛啄睡；書房嘛狼離狼犁，滿天滿地，睺著即起懶。啊！歸個人即像得大石頭砗蹠，感覺壓力真大！有遐擺个經驗，係正知「坐久變懶尸，睡久成破病」這句事實在有影，正經係「學勤三年，學懶三日」。

係這滿毋會擱恁，毋敢擱懶尸啊！自家个物件，定著會隨時收好勢，毋會儘採烏白因，係會拗屋下整理到淨俐淨俐，食飯飽，嘛會好好撿拏；係會利用時間，認真讀書，猶會保持運動个好習慣。做事情，會較緊手，趁燒趁熱去做好，實在係「毋驚事難，頭驚人懶」！

漸漸，係了解著老儕講个事——「人勤地獻寶，人懶地生草」、「勤人跋高快，懶人伸手難」、「人勤滿穀倉，懶尸空米缸」、「人勤身體好，懶尸破病多」這兜苦勸人愛勤个道理。總講「學勤三年，學懶三日」。慳人个生活討好，即愛較打拏兜，若種作有用心，鏝頭下即會有黃金！

<sup>1</sup> 溜溜漂漂：音 liuˋ liuˋ piuˋ piuˋ；形容人遊蕩貪玩，無所事事的样子。

111 年全國語文競賽客家語讀者劇場文本高中組（詔安腔）

編號 15 號

### 【 佢个屋邊隔壁 】黃詩婷原作

人講个「屋邊贏過遠親！」有影無毋著。佢人生活內底，真多事情攞無法度自家一儕即做會好，愛屋邊頭尾來鬥相共，所以蹠在上家下屋會相照顧个社區，係嶄然福氣个。

蹠佢上家个遐火灶，大人細子攞真善良，對人真好。遐個阿婆，堵著熟事个人攞係滿面笑面來相借問；脛著生份人，嘛會和佢頷頭<sup>1</sup>、借問！佢人兩公姐，無論莊內麼儕屋下有好事、抑係歹事，無即廟做鬧熱，攞會義務去鬥相共，對屋邊頭尾嘛真親切，真有人緣，大家攞真愛和佢人答嘴鼓。所以，佢个後生、新婦真有孝，降个細子，講事輕聲細義，滿足好禮，真有大細、知輕重，得大家真安啱！

蹠在佢屋下對面个伯婆真打拚種菜，逐日烏昏攞會去菜園沃水。佢講，自家菜園種个菜無射農藥，又真萇，食起來較安心！所以，逐擺有收成，攞會送菜得佢人煮來食。

斜對面个伯公真涼樂，生活態度係「手疾好過家，腳疾好繡花」。不時會脛著佢在大坪遐，坐在矮凳挨弦子、唱山歌，得人

聽到真快活，麼个擘心、艱難攞無啊！一半下，佢嘛會跔外公去佢个屋下泡茶、歇涼，聽佢講古，感覺真心色，得佢感受著「敬老得福，敬禾得穀」个道理。

毋過，蹠佢下屋个人，真操煩！兩個後生真毋聽教治，毋成細子，兩兄弟歸日亂亂吵吵，冤家羅債，猶直直會相打相拚。做爺母个講無兩句，佢人即頸硬硬、頭撇撇、目珠惡惡，像討食人个形，和佢个阿怙、阿依嘛毋敢教，不時氣到面紅目赤，正經係「敢死，閻羅王嘛驚」！毋若影響著莊內个安寧，大家嘛驚壞壞，堵著恁个屋邊，實在愛有真好个度量。

遐火灶以外，佢个屋邊頭尾大討攞會相照顧，歇暍日出門，嘛會鬥相共顧屋。逐禮拜六个晨早時頭，猶脛會著真多義工阿伯和伯嬭，擎祛齊和奮斗，在遐掃大路、拚垃圾、清溝子，表現出大家團結合作、愛護社區个精神！若係莊內辦活動、廟坪做大戲、做醮、迎神做鬧熱个時務，大家會作埕鬥相共、鬥鬧熱。

<sup>1</sup> 頷頭：音 dim<sup>ˆ</sup> teu<sup>`</sup>；點頭，有表示招呼或應許之意。

111 年全國語文競賽客家語讀者劇場文本高中組（詔安腔）

編號 29 號

【行春】邱一帆原作

新春時務，隨輕鬆、歡喜个心情，跔寬寬、毋使攔緊个腳步，去外頭行行奈奈，睺山睺水，睺樹睺花，睺世間靚靚个風景和色彩，這係「行春」，毋係「走春」。

新春在南莊，路脣个櫻花一頭一頭開出靚靚个花，有个水紅，有个足紅，猶有个暗紅，真像在歡迎春天，嘛真像在歡迎來南莊行奈个人客。逐頭櫻花樹、逐蕊櫻花攏有無共款个形象和色彩，即像逐個人，用無共款个生命角色，表現自家。濛和涼風相捎，雨水和日頭换位，展出百變个面容，春天多姿多采个本色。緊緊，用慢慢个腳步，行春到南莊。

南河和東河合水个所在，名即係喊做中港溪个起頭。向南睺去，虎山著綠豆色个衫，和頭前櫻花个紅搭配，清清个流水唱出春天个歌聲，猶言謝淨个芒花跳起青春个舞步，猶有樹嶼打到纍纍个橄欖，在涼風內搖啊搖。這時務，坐在石頭凳面上，目金金直直睺青山、流水、綠樹、紅花，歸下彩色个、恬靜个、快活个、歡喜个心情，自然在自家个故氣、在自家个血脈內底直流，漸漸流入腦筋內、行上心肝頭。這時務，留一份恬靜得自家，毋

使去爭買老街屋簷下个菜包、嘛毋使去搶買桂花巷个桂花釀，即恁快活，睺康濟吊橋在空中散步，睺天嶼高个雲霞變換無共款个身裝，嘛會用目珠眨眨，聽自家个心跳，聽自家个心情講事。

行上海拔七百三十五公尺个昂天湖——一個面向天嶼个陂塘，猶毋會赴掀開神秘个面紗。圓舞場面上一大陣个濛猶在遐張樣，即像細子人攔都攔毋會走，毋使吵毋使鬧，等到日頭出來，涼風吹過，濛即走到噴框。遐係矮靈祭時務青青个草坪，月光照落，濛內底，賽夏族人著傳統衫褲，結臀鈴，擎月光旗，跔祖靈祭歌，跳蛇形个舞。為著攔走雨水、濛，隨轉月光清風，姓朱个長老擎鹿樹皮編出百步蛇樣个神鞭，在祭場中央直直拂、直直拂，這場景一齣一齣即在自家个目珠底演出。攔行入脣頭个賽夏文物館，坐在簡報室內底，你會用睺著雷女下凡个故事，嘛會用了解矮靈祭典个由來……。

蹠在南莊个厝，心肝底真確定，行春即愛寬寬子行，寬寬子睺，毋使走遠。

111 年全國語文競賽客家語讀者劇場文本高中組（詔安腔）

編號 41 號

【雨傘】張美容原作

無聊个落雨天，一個人無著無落，企在門前睺街路擎雨傘來來去去个人，有半行半走緊掣掣个，嘛有款款子行享受雨中散步个；有一個人擎一支雨傘孤單、孤單个；嘛有兩儕捍肩頭共下擎一支雨傘个。佢心肝底想：「一傘一世界，雨傘矮下一定藏有真多故事。」

在門角企踫像一條瓜个雨傘，打開，即係佢心肝底个一蕊花。猶細漢時務，在街路睺著一支紅色摻青花个細支雨傘，愛到堵毋會核。打先阿依嫌傷細支，遮雨毋會過，毋肯買。毋過睺佢目汁含踫，落尾猶係買得佢。這支雨傘變做佢个寶貝，若落雨，佢即著紅鞋笏，擎紅雨傘，這屋行，遐屋奈，真風神。好天，雨傘嘛無閒著，毋係提來賞辦家貨，即係擎來跳舞。遐雨傘花轉幾下輪，雨傘下个妹子么笑到嘴合毋會悞。啊！歡喜、單純个細子時！

讀小學，放學若堵著西北雨，阿依即會送雨傘來學校，順續渡佢轉。一路兩子哀念遐念這，阿依一下一下吩咐：「水窟毋好蹬落去，溼溼个所在愛閃開，雨傘愛睺風向正毋會開花。」雨傘

外頭風和水，雨傘內底有阿依淦淦个愛！到較大兜，在城市讀書，阿依一睺著變天，即愛佢隨雨傘去。佢頭驚擎一支雨傘，落尾嘎出大日頭，得人睺著即像毋識出空个山精大惹共款。擱講，遐個年歲小說睺多啊，總感覺迎震震雨，行在街路，係幾浪漫个事情。所以不時為著討隨雨傘、毋隨雨傘和阿依相爭，唉！毋識人好个少年！

緣分實在係奇妙个物件。大啊即會堵著一個人，甘願自家涿溼，嘛愛拗你擎雨傘遮雨；甘願自家炙日頭，嘛討拗你擎雨傘遮日頭，伴你行過坎坎坷坷<sup>1</sup>个人生。毋管外頭雨幾大、日頭幾猛，雨傘下總係燒暖、平安个。當然，佢心肝底猶有一支頭要緊个雨傘，雖然睺毋會著嘛摸毋會著，毋過，佢總係在佢堵著大風大浪、失志無助个時務，拗佢措密密、遮塞塞，保護到好好，遐即係爺毋拗佢擎个愛个大支雨傘。在這支雨傘下，佢無煩無惱，安然自在大漢！

熱天時个雨傘面上，有白雪雪个桐花在遐跳舞，落雨天即有滴滴落落个雨水在遐唱歌。擎雨傘行在街路个人，一定和佢共款，毋知有幾多故事在雨傘下演出！

<sup>1</sup> 坎坎坷坷：音 kam<sup>ˆ</sup> kam<sup>ˆ</sup> kied<sup>ˋ</sup> kied<sup>ˋ</sup>；路不平的樣子。

111 年全國語文競賽客家語讀者劇場文本高中組（詔安腔）

編號 48 號

【糟嫲】何秋桃原作

逐擺在寒天俾過年個時務，佢即會想著阿依做個「糟嫲」。紅漬漬個糟嫲即像年個代言人，拚勢用佢一身個紅色，猶攞有糯米發了後個酒香，合落俾年個喜氣，隨來一種福氣個感覺，嘛係預告過年討到位啊！枵鬼個細子，言曾言即頭勾勾直直望，望若係有一支糟嫲雞髀抑係糟嫲雞腳好喫，毋知有幾好。

阿依做糟嫲個功夫一流，酒香歸屋間，佢猶會用豬肉、雞肉、鴨肉……變出好食個糟嫲肉。過年時務，桌竦定著會有紅紅香香又錫人食個糟嫲肉。兄弟姊妹睭著這盤菜，逐個目金金，拚緊緊，無幾久大家即食到恬卒卒，無閒好講事，手指公喇到唧唧啱。阿依總係會在脣頭大嫲聲講：「毋好恁貪食，愛留一兜仔得你阿怙食哦！」

冬節前後，阿依即會開始做糟嫲。佢講：「做糟嫲毋會用儘採，尤其係紅麴頭要緊，愛擇較好個來用，發酵若無發起來，遐即會像菜籃擔水做白工；另外酒愛用純米去焗個正會香，糯米愛用圓個正會補。」做糟嫲愛先炊糯米，竹籠床鋪好版布，拗洗好個糯米漕落去；愛用文火，毋好傷猛，即會炊出虬虬攞有竹香味

個糯米飯。逐擺睭阿依開始炊糯米，佢即在脣頭顧蹓，睭等下會用先分著一碗來食無？阿依會笑佢講：「真枵豺哦！猶言好，即枵壞壞，枵鬼係無。」在遐無麼個四秀個年代，無枵豺即毋係細子啊！

糯米炊好愛先囷在桌竦得佢冷，攞來紅麴用酒先浸蹓，講麼個恁發酵正會發較靚；等糯米冷了後，攞拗紅麴、酒歸下漕落去共下攪得佢勻，頭尾裝入醃缸封起來即好啊。個半月了後打開來睭，會鼻著一臨臨個酒香，遐原本一粒粒啣飽酒個糯米，發酵了後，自家嘛會焗出酒，變到像糜個樣，歸醃缸個糟嫲紅到真得人惜，到恁即表示會用食啊。討食糟嫲肉，即拗肉先焗熟，濾水濾燥，囷落糟嫲醃缸內底去浸蹓，大討一、兩禮拜即會用上桌！這兜肉食起來有香香個酒味，毋會油、毋會畏，總係錫到人個舌忍毋會核蠕蠕動起來。

糟嫲即像美食個奇術師，料理千變萬化：煮卵酒、炒飯、炊魚抑係單單攞飯攞會用，毋單好食猶會用補身體。今年過年佢決定自家來做糟嫲，透過做糟嫲個過程，攞一擺感受阿依個燒暖。

111 年全國語文競賽客家語讀者劇場文本高中組（詔安腔）

編號 51 號

【麻竹坑】陳宜楠原作

無講毋知好，毋講你毋知，拗你紹介一個心色个所在。這跡位，春夏秋冬，一年透天攞真靚，真錫人，無論係愛睇山景，抑係愛跋山个人，來到這，定著會得你歡頭喜面，歸日，毋知好轉。

客人莊个麻竹坑遐跡位，你識聽過無？遐在臺中市新社區，較接近和平區，佢東勢方向大甲溪个東片，號做天冷，過了天冷橋，遐大甲溪个西片，正號做麻竹坑，福興係里名，成過種真多麻竹，正號做麻竹坑。

遐有幾闊，你知無？來做一個例得你知。大臺中市个行政區，新社區个闊即排第二，本區十三里，福興即占一半个面積，一個里闊過歸個石岡區，比遐世界小島國，諾魯个土地不止大十倍。

九二一大地動了後，麻竹坑發揮客人晴耕雨讀个客家本色，社區總體營造比賽，全國著頭名。麻竹坑，山靚水清好地理，這跡位有歸大陣个客家子弟，這跡位有醜醜个人情味。屋簷水點點對，上輩對下輩，客人忠孝傳家个傳統，在這跡位逐位攞係。

客人係靠山絡食个民族，佢靠佢人開山打林个膽，在這歸山錫人食个果子，白毛臺个葡萄、柑子，頭批、二批个枇杷、甜柿，做一下國內有名聲，國外真出名。

大圳溝白冷圳个源頭係大甲溪，佢流對麻竹坑个脣頭過，這相連續無斷个水，蔭偲人个土地和園以外，攞得佢有水好用，食水都利便。麻竹坑个青色天嶼，不時會有一陣一陣个白卵鷺飛過去。熱天个時，清清个溪底，會有大人細子在遐賞水、藏水汨。麻竹坑个大廟福天宮，香火興旺，庇佑大家平安順序。

「二餘草堂」係本社區「大林國小」詹進有先生退休了後，自家規畫用心起个。佢希望社區大大細細在「學業」、「農事」以外，老老嫩嫩來學寫大字、學手藝，遐跡位即得人脛會著客家文化傳承个前景啊。

這跡位个大鼓陣，嘛代表麻竹坑客家音樂和精神个傳承。鼓聲，一臨一臨響起，摧響土地个生命力；鼓聲，一臨一臨攞響起，傳出聽著社區个福氣和未來。有閒來寮，甜甜个果子在遐等你；有閒來寮，靚靚个好山景，在遐等你；有閒來寮，醜醜个人情味，在遐等你。

111 年全國語文競賽客家語讀者劇場文本高中組（詔安腔）

編號 69 號

### 【秘密基地】林伯殷原作

逐年寒天，佢會去行屋下後背个一條山路，這條山路頭前站匡紅泥，睭起來即像一條普通个產業道路定，無麼个怪奇。毋過，跋上山嶼，變做泥路了後，這條山路黏時即變成佢个秘密基地，見擺行入這位，佢歸個人即變到十分輕鬆快活。這條路得大樹和竹遮到密密，炙毋會著麼个日頭，泥下鋪淦淦跌落來个樹葉和竹葉，有一兜樹、竹橫在路頭，有一兜石領和路脣个石礮崩落去，歸條路睭起來即知無麼个人行。這下，會行這條路个人，大討即係撥工來行山路運動个人。佢來這，除了運動以外，猶會用感受這片山林个恬靜。共時，得風吹、聽鳥聲、睭大樹和蹬樹葉，做下聽毋會著山下个車聲和機器聲，久啊，佢嘎起私心，毋盼个得人知這條山路，即係驚傷多人來吵著佢个秘密基地。

佢个秘密基地會驚人知，係因為秘密基地無恁快尋。猶攔，秘密基地若得傷多人知啊，遐敢猶係秘密基地。細漢个時賞點膨嬰，大家想盡辦法藏起來，毋會用得做鬼个人尋著，有幾下儕特別有辦法，逐擺攔藏到人喊「放牛食草<sup>1</sup>」正走出來，大家真想討

知佢人藏在哪位，即會偷偷跔著佢人去藏，毋過傷多人藏作埕个結果，總係無兩下半即得鬼發現。所以，賞點膨嬰个時愛真小心細義，一頭愛尋所在來藏，一頭猶愛提防自家藏个所在會得別儕知去無？對佢來講，秘密基地毋單係拗自家藏起來个所在定，更加重要个係，秘密基地係放鬆自家个所在，在遐，人會用隨在自然，無麼个好操煩，無論時間長短，就算十分鐘、半點鐘嘛值啊。

人个心情總係變來變去，有時務想討尋人答詔、招伴賞，有時務又想討尋一個秘密基地藏起來，得自家供電一下。讀國小个時，有時和同學冤家了後，佢會自家行細條路穿過學校崁下个竹頭，去陂塘脣打漂溜休。讀國中个時，有時務考試考無好，佢會騎著鐵馬去山底、去溪底寮。到較大兜，堵著一兜問題，佢會去圖書館搵一兜書，無即尋一個角頭个所在來恬恬坐。這滿，佢佻意去行人少个山路。自細到大，佢隨時攔有秘密基地。毋過，佢添放秘密基地換過幾多擺啊？有一兜秘密基地嘛早即尋毋會著啊！

頭尾，佢想偷偷請問你一下，你个秘密基地在哪位？有得人發現無？

<sup>1</sup> 放牛食草：音 biong<sup>ˆ</sup> ngiu<sup>ˆ</sup> shied<sup>ˆ</sup> coo<sup>ˆ</sup>；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

【田頭田尾齣頭多】劉玉蕉原作

「唧唧唧、唧唧唧」麼个物件在唧唧唧？土狗？草蜢？佢輕手輕腳行俾去，唉！佢人嘎禁聲<sup>1</sup>啊，電線面上个屋簷鳥相準佢，嘛係恬卒卒！仰子講呢，佢毋係人客，嘎有遐吵著人个否勢心情。大聲一喊：「阿怙，佢轉來啊！」聲一出，嘎來驚走一陣鳥。討暗个日頭，慢慢閃到山背去，留落紅霞滿天，靚到堵毋會核哦！

屋脣个兩塍田，係祖產，這滿真好價，毋過阿怙毋盼得拗佢賣莫。用天然个方式，阿怙年年蒔田割禾，畝个白米、糙米，蹠城市个阿叔、做生理个阿伯、阿姑、叔婆，做一下攏有份。田脣、田角阿媽即會加減種一兜菜，因為田底長年無射藥，鳥多蟲嘛多，無讀書个歇暎日，愛拗阿媽鬥捉蟲，係佢發夢都會打著驚个事頭，遐青青、軟濟濟<sup>2</sup>个菜蟲，在嫩嫩个菜莖、菜葉面上蠕蠕動蠕蠕動，唉！真得人驚呢！檢採力頭無使好勢，在手底佢猶會脫腸貶肚得你脛，想著遐伸一緣皮个細細生命，即按得你收去，你个雞嫫皮敢毋會直直膨起來？總講一句，除了鬥捉蟲這件事，田頭田尾猶係佢一放學轉來，即從上從落个好所在哦！

<sup>1</sup> 禁聲：音 gim<sup>ˆ</sup> shang<sup>ˇ</sup>；聲音軋然而止。

<sup>2</sup> 軟濟濟：音 ngien<sup>ˇ</sup> zob<sup>ˋ</sup> zob<sup>ˋ</sup>；軟綿綿。

蛇係人客，毋過真少脛著，因為按，蛎聲四季無斷，正蒔个禾田底，鴨嫫屎蛎拂尾<sup>3</sup>泗水，直直到斷尾生腳、跳上田脣面上炙日頭，佢人心色个身影，輒輒錫著佢恬恬跔在田脣，賞鴨嫫屎蛎；摩細隻蛎！跋起身，即嚇著這兜大隻蛎、細隻蛎驚到掣屎，相爭跳落田底去。佢田脣走一輪，「喇、喇喇喇……」走幾緊聲即幾密，實在好賞！跔著蛎聲，禾田底會出現一圈一圈个水痕，越遠越大，一圈套過一圈，圈想討套遐倒映在田底个青天白雲，猶擱彎彎翹翹<sup>4</sup>个屋舍，毋過，自一溜攏毋識套著麼个好物件。

青溜溜个禾一日一日抽高，清風吹過，禾即窸窸窣窣講細聲事。阿怙擱稗子，佢褲腳摺高高跔佢落禾田，打赤腳蹬落濫泥底，腳撓撓，像幾下百隻細隻魚咬腳囊、撓腳底，清涼涼个感覺，直直透到心肝頭，唉呀！難怪阿怙恁愛蒔禾，猶真好賞呢！禾勾頭个時，阿怙會緝禾稗人嚇鳥，田頭栽一個、田尾栽一個，中央猶擱愛釘兩個，阿妹花花个衫褲真合用，衫褲一著，三角旗一牽，哇！歸大片田鬧熱滾滾，實在心色！毋過，精差差个鳥無嚇著，嘎輒輒嚇著暗夜跋起來屙尿个佢。割禾啊，割禾機拗禾剃三分頭，一行過田底即剃到光光，電線面上歸排等討絡食个屋簷鳥，這滿急壞啊！

田頭田尾齣頭多，打幫阿怙个堅持，網路以外，佢這兜猶有另外个一種選擇哦！

<sup>3</sup> 拂尾：音 fid<sup>ˊ</sup> mui<sup>ˇ</sup>；擺動尾巴。

<sup>4</sup> 彎彎翹翹：音 bban<sup>ˇ</sup> bban<sup>ˇ</sup> kioo<sup>ˆ</sup> kioo<sup>ˆ</sup>；此處指因受水波影響而歪斜不正。

111 年全國語文競賽客家語讀者劇場文本高中組（詔安腔）

編號 71 號

【細子頭王】曾秋梅原作

歇暎日，天略略仔光，即會得大人喊好跋起來，去田鬥相共割田蒔草、顧牛，無人敢搵眠床。無細子在賞个禾坪，恬靜到連狗都懶懶，搵在花樹下啄睡。毋過當晝一過，歸禾坪攏係細子在遐賞，唏唏嘩嘩，吵到屋嶼都會掀去。

伙房个阿正係有名个細子頭王，當晝時頭老儕討睡當晝，佢即偏偏討和一大陣半大細个伴在禾坪賞球，擊來擊去賞到真暢。球若係無生目珠輪到叔婆屋下，遐即艱難啊！叔婆係有名个惡，阿正天毋驚地毋驚，正驚叔婆定。佢躡<sup>1</sup>腳尾入去尋球，無想著球得叔婆掇去，大嫲聲罵：「你人這兜細子創治人，想討睡一下當晝都無法度，球剖剖莫，睭你人討賞麼个。」阿正驚到面青青，從歸路企在屋簷下，嘴雜雜唸擱直直頓腳。

俛暗阿正又在禾坪賞藏膨嬰。伙房屋像老鼠空，佢人細子從上從落，驚得人尋著連屎缸嘛走入去藏。阿正真好膽，跳到豬滌底藏，無細義嘎蹬著豬么，豬么疾到吱吱呖，佢著驚走出來，好

死毋死徑著豬槽嘎來跌倒，額頭推著圍牆起一大垠<sup>2</sup>，得厥怙拈到喝毋敢。

熱天个時務，莊下个細子真愛去河溪賞水，賞啊賞，毋使開錢即學會曉泗水啊。西北橋下个溪水係三洽水，三洽水會合个所在即會有水漩<sup>3</sup>，對面上睭落去真得人驚。

有一日，阿正又招歸陣去溪泗水，遐下，在溪賞水大概攏脫淨淨在溪跳上跳落，無麼个好見笑个。大家賞到當暢个時，阿正對橋嶼出力一跳，阿依哦！「四溝水<sup>4</sup>人蹬牛屎——真準」，嘎跳落水漩底毋見去啊！共陣个驚到大聲喝：「救命哦！有人沉水啊！」阿正命真大，遐時堵好有一個在溪脣顧牛个少年人，佢一聽著牛索一放，攔緊跳入水底，拗沉到水漩个阿正救起來。

人講：「大難不死，必有後福」，細子頭王阿正出社會了後，真經在臺北食頭路趁真多錢，對莊內个修橋鋪路出錢真大路。擱較要緊个係對救命个恩情人，過年過節定著大擲細擲去厥屋下答謝，無一年添放過。

<sup>1</sup> 躡：音 nang<sup>ˆ</sup>；踮腳尖。

<sup>2</sup> 一大垠：音 rhid<sup>ˈ</sup> tai long；一大腫塊。

<sup>3</sup> 水漩：音 fi<sup>ˆ</sup> cien；漩渦。

<sup>4</sup> 四溝水：音 si<sup>ˆ</sup> geu<sup>˘</sup> fi<sup>ˆ</sup>；屏東萬巒地名。

111 年全國語文競賽客家語讀者劇場文本高中組（詔安腔）

編號 78 號

【遠方个人客】劉玉蕉原作

毋知對哪日開始，屋簷下恬卒卒啊！打早，大門吉開，心肝即掛心著遐烏烏个身影，會入佢目珠來無？泥下有屎愛清無？門一打開，臥頭睜著个係失望，佢等啊等，日頭款款徒步，照到門斗來啊，空空个鳥藪，等無佢个主人，佢，等無佢个人客。

春天，係造物者變奇術个季節。空氣內底猶存有寒天个氣味，攔較多个係春天个燒暖，清風撩人，在鬧鬧个花、嫩嫩个葉莖之間流連，蜂和蝶嘛跔个歡喜採蜜！佢帶來生命，恁，係毋係嘛會帶來遠方个人客？佢日望夜想，出入大門个時，總會臥頭睜下，祈求遐遠方个人客，千萬毋好添放自家个舊藪。

一陣吱啁聲對屋簷下傳來，歸屋下人從出去，頭臥臥睜遐熟事个身影，舊年个燕子尋轉來啊，即歇在佢人舊年做个鳥藪內底，兩粒烏烏个頭那探出來，四蕊目珠和佢人對睜，算係相借問啦！佢人有和老朋友見面个歡喜，佢人用清清亮亮个吱啁聲來回應！過了幾下日，屋簷下真鬧熱，嘴底銜泥个鳥影，咻下出、咻下入，舊藪个上緣，越沿越大、越做越高，值討碰著天篷啊哦，阿依講：「擘心麼个，佢人毋會比你較戇啦！」係哦，恁遠所在

尋會著路轉來、會起屋蹠，猶毋會屙落來，佢正經輸恹恹哦！

撈腹个鳥藪做到差不多啊，日時頭兩隻燕輪流飛出去絡食，夜來一隻在藪內底，一隻跔在藪脣。阿依講：「佢人輪流在孵卵哦！」正經，成半個月過，即聽著幼幼个鳥么聲啊，攔總有四隻，鳥公和鳥嫲出去尋食遐下，佢人會乖乖在藪內底等，一聽著爺哀夾蟲轉藪个聲說，嘴即擘大大搶討食，做爺哀个一擺攔一擺飛出飛入，四支嘴像無底深坑，逐回攔嘴擘大大啾啾啾討食，怪奇个係，爺哀仰子會知哪隻飼過、哪隻吉食咧？

鳥么生幼毛啊，耷耷个頭那殼不時弄啊弄探出鳥藪來，鳥公、鳥嫲跔著日頭个腳步猶係飛出飛入，無閒挾掣。鳥么一日一日大，臉身个毛對火灰色慢慢轉做烏金个翼毛遐下，鳥公、鳥嫲即會半拐半惑教佢人學飛，這時屋簷下頭鬧熱，嘛係佢人頭歡喜个時務。慢慢，這藪鳥么自家會絡食啊，即恁生命攔循環一擺，生生不息。勞力這藪燕子，得佢人體會著生活內个心色事，同時嘛感受著有阿怙阿依照顧个幸福。